

四庫全書

集部

欽定四庫全書

集部
集玉山房稿卷一

詳校官中書

臣徐志晉

侍讀臣孫球覆勘

總校官進士

臣楊懋珩

校對官中書

臣范鰲

謄錄監主

臣劉晉

欽定四庫全書

集部六

集玉山房稿

別集類五

明

提要

臣等謹案集玉山房稿十卷明葛昕撰昕字幼明號龍池德平人官尚寶司卿昕以蔭起家初除都督府都事陽武侯薛銀以貧故幾不得襲昕力排羣議銀始得襲封尋遷工部屯田司郎中議裁惜薪司炭額百餘萬又汰

廠司內官五百六十一人禍幾不測然連三
疏爭之竟如議又爭戚畹鄭福濫請卹典雖
不行天下壯之其風節頗侃侃不阿其他文
亦踈爽駿快無媿妬齷齪之氣肖其為人惟
贈孔劍峯一序似乎溺于左道不類所之所
為然所不得其父母遺像孔以術追寫如生
故喜極而譽之發于孝子之心不自知其言
之失猶可以曲諒者也是集為其子如龍等

所編凡疏一卷贊語一卷詩一卷序一卷誌
狀一卷記銘跋一卷啓一卷書二卷祭文一
卷今仍其舊第著之於錄焉乾隆四十四年
五月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

集玉山房稿卷一

明 葛昕 撰

疏

壽宮營建事宜疏

題為欽奉聖諭事准禮部咨該本部題萬曆十二年九月二十一日司禮監太監張宏等傳奉聖旨朕奉兩宮聖母閱定太峪山吉地茲仰奉慈命遵皇祖故事預作

壽宮一應營建事宜禮工二部會同擇吉日來行欽此
欽遵恭捧到部臣等查得嘉靖十五年我世宗肅皇帝
預擇壽宮既得吉兆隨即命官營建規制盡善福祚無
疆今我皇上睿謀遠識親卜大峪山吉地復恭奉兩宮
聖母閱定為萬萬年壽域隨勅臣等會議預建事宜仰
見大聖人之作為同符皇祖超越百王乃卜世卜年之
洪基而非尋常營作所可擬也臣等祇承綸命敢不殫
心經畫仰贊巨典謹遵照嘉靖年間事例叅以今所應

行逐一議擬開列上請恭候聖明裁定節奉聖旨是伐
木祭告遣公徐文壁興工告九陵遣公徐文壁朱應禎
侯吳繼爵郭大誠蔣建元伯王學禮劉應元衛國本王
偉天壽山駙馬侯拱宸后土等神尚書楊兆各行禮欽
此該本部擬奏差官處辦木植磚石物料及工匠夫役
等項徑自題請施行臣等奉查嘉靖十五年預建壽宮
經費浩繁規制物料俱候內外重臣親詣天壽山規畫
會計議處具奏所據處辦錢糧工匠等項及本部應委

司官合行事宜相應急為議處仰惟皇上神謨宏遠睿思精詳法皇祖之弘規承兩宮之慈諭特勅臣等預建壽域誠足以培億萬載靈長之慶一切營建事宜該臣等遵奉成命已會同禮臣恭照嘉靖十五年事例將開山興工吉期并應差內外大臣已經具奏題恭候聖諭欽定職名其科道兵部司屬錦衣衛內官監等官移文各該衙門聽其徑自題請至於各項物料數目合遵先年事例候欽命內外重臣會同科道等官親詣大峪山

督令官匠人等踏勘從實會計前來另行具題外所有
臣部總理工程提督工程并催儹物料兼督大石窩等
處堂上官亦均候聖明裁定其應差司屬官員及議處
錢糧木石磚瓦等料并工匠夫役應行事宜議擬列款
上請合候命下臣等欽遵施行其有未盡事宜仍聽臣
等內外大臣會同酌議具題

計開

一議分職掌照得大工工役重大司官須委任分

理各有專責庶便考成所有本部司屬合無一一
分派職掌除本司掌印官臣斯管理錢糧不時往
來工所調度一應工役其常川在工驗收木植磚
灰石料催儹夫匠管理工程似應差委司官四員
山台兩廠管造粗料司官二員神木等廠收發木
植司官一員大石窩馬鞍山白虎澗開取石料及
燒造石灰司官三員瑠璃黑窯燒造磚瓦司官二
員大通橋查發磚料司官一員其臨清燒造城磚

通州查發磚木即劄委本處註選司官各行管理
不必另行差委以滋煩費

一議處錢糧照得工程重大支用錢糧自當浩繁
今查本部節慎庫見貯屯田等司堪動料價事例
為數不多合無先儘見貯銀兩支用其各省直拖
欠本部各項解京錢糧應照先年差委司屬官分
投守催但恐於各地方未免騷動今次合只嚴行
各省直撫按官勒限將各該司府節年拖欠匠價

料價并見開事例銀兩除蠲免奏留外上緊盡數
催徵按季作速解部接濟臣等多方撙節務期有
濟如再不敷仍查照嘉靖年舊例具題勅下戶部
兵部查發協濟庶錢糧不致缺乏而工程可為永
賴

一議查處木料為照工作肇興首莫要於聚材本
部各廠舊存木植近因鼎建慈寧宮殿及添脩龍
蹕殿等處將收貯楠杉鷹平取用數多見存數少

即今大工需用柁散等木除照例派行各商買辦
外楠杉等大木合先將各廠見存者委該司官會
同內監酌量取用一面仍移文川廣等處撫按官
查照先題數目陸續催解前來接濟再照在廠木
植徑運大峪山工所道路寫遠為費不貲合無行
內官監差掌尺寸官作在於各廠查照原估棟柱
等項照數截成粗料方行運行赴該工出細遺下
頑頭木屑即盡發瑠璃兩窯燒造瓦片庶於工作

兩濟

一議採石恭照壽宮興建惟用石料數多而開山鑿取拽運更艱查得嘉靖十五年各項石料俱在大石山窩馬鞍山牛欄山等處開取即今應用石料仍應照舊在於各山取用合無先差監部官帶領匠作前赴各山勘驗分別青白石及白玉等石某塘堪充某料預為會計多召匠作分塘照數開取先儘地工所需刻期開出聽運務要堅細合式

期濟實用

一議燒造磚瓦照得瑠璃等窯并蘇州臨清等廠
燒造磚瓦往年率有粗惡不堪應用雖節經移文
嚴督如法燒造猶自玩習如故今鼎建壽宮非尋
常工程可比前項各料合行內監并各廠委官查
照先年式樣務要澄漿得法火力俱足體質堅細
各記窯戶姓名以便查考其大通橋張家灣磚廠
本部即行該管司官將見積各項磚料查明呈報

聽候運用不足數目仍照先題事理行催蘇州臨
清等廠照數派運立限解赴前來應用又查得昌
平州迤東地方先年原有窯座俱曾燒運上用磚
瓦其道路去陵頗近合無多招窯戶即於該州地
方採取細土如法燒造務期精堅合式仍聽各窯
戶自運工所驗收與臨清黑窯各磚相兼應用尤
為省便

一議燒運石灰照得磚石所需全賴石灰為數頗

鉅若驗收無別則弊竇易生查得馬鞍山燒運灰
色潔白軍莊灰性稍次且道路有遠近價值有多
寡合無以十分為率軍莊止准燒三分嚴行該管
司官各另給號票運送監工官處對票驗收原灰
不得卸地堆積以滋守候等弊仍不許將軍莊灰
充馬鞍山白灰及將沙石揷和希冒價值違者管
工官從重究治庶宿弊可釐而灰皆實用

一議均買辦照得物料有貴賤價值有盈縮本部

雖有會估尚有開載未盡者一遇派僉買辦各商
遇有利者鑽刺承攬無利者展轉推避今值大工
興建預支銀兩動以萬計若不議擬畫一不惟錢
糧難完抑且有妨工務合無查照先年及今惜薪
司柴炭事例將本部鋪戶分作四把中間審其家
道殷實及有行止者一二名為首衆各連名保結
每遇關預支銀兩同赴領敢有侵費而同把不舉首
者坐令均賠庶苦樂相當永杜規避錢糧可濟實

用

一議取車輛照得裝運木石等料車輛在灣廠責
令通惠河郎中差派在內廠分撥見役車戶承運
但本部及灣廠原額官車數目不多分運石木不
敷應用查得嘉靖十五年舊例原額派取直隸各
府車戶裝運合無仍行各該巡撫衙門轉行順天
真保定等府附近州縣僉派車戶報部仍候本部
明文至日方酌量解部應用亦不得一槩濫行派

擾其運過腳價照估散給完日先期發回庶輸運有濟工作無悞

一議處匠役照得大工興作木石瓦搭等匠合用數多遽難召集查照嘉靖年間事例隨工匠役行戎政衙門及五城兵馬司宛大二縣拘集其開山石匠行順天真保定等府州縣會解合無將前項各匠俱各照例在內仍行戎政等衙門多方拘集在外應取開山石匠仍行各該巡撫催取解部俱

要精壯藝熟者方准收用本部照估給與工食各匠夥內令推有身家行止者准作頭役便於約束衆匠其承領工價見工分給仍嚴禁頭役侵尅俾各匠趨利赴工方為有濟其大工興建之日民間私工不許占愰匠役有礙拘僉仍行各城巡視御史出示曉諭

一議處軍夫查得嘉靖十五年營建壽宮兼脩七陵至用官軍十二萬更番應役今建此大工合公

同內外管工官估用軍夫若干照舊例咨行兵部
行移京營摘撥赴工應用其永輦二營摘撥殺虎
手并見在各朝房看守錢糧軍人巡山防山要務
嚴謹不致疎虞仍各免其捺脩其京營軍夫俱聽
提督工程官及兵部司官點閘同工部司官量工
撥派與本部募夫相兼供役仍照例給與鹽糧造
冊送戶部關支

一議支銀兩照得夫匠之在山工既離京寫遠薪

米不便照常等候出給實收不免有誤工作合照
先年事例給發預支銀每次二三萬兩差官解發
昌平州寄庫聽候提督大臣按月酌量給發放支
陸續另發接濟該工司官仍每半月出給實收一
次赴監視工程科道掛號每一月開具揭帖送提
督大臣并呈本部查明照數扣除每季終該工清
查出給數目仍該找給銀兩若干報部以便算給
年終通將給過錢糧造冊奏繳

卷一
一議處供應照得在工諸臣駐劄山陵非歲月可計俱應量給廩餼但昌平州素稱凋疲一切應付俱責令處給勢必不敷合無移文順天撫按衙門查將偏僻州縣驛傳及無礙銀兩酌量派發該州協濟每年終各將派取解送過數目咨部查考庶免偏累

一議處軍夫匠作止宿處所照得大工興舉人人露宿原無室廬倘遇風雨何以存息合無咨行提

督并天壽山內外守備許於紅門內外近工遠樹處所聽居民人等隨便搭設浮鋪出賣飯食具做工軍民夫匠或二三十名亦許搭蓋席舍一二間居止如敢有棍徒生事搶騙嚇詐財物者悉聽巡視官校訪拿究治

一議取水泉照得山中水泉甚少軍民夫匠屯聚萬衆仰給於水時不可缺查得嘉靖年間興建壽宮既截取河流復多開井眼合無行令內外提督

等官督率欽天監官相勘附近工所地方但於龍
脉無礙處所即多方開濬井泉務足軍民夫役朝
夕汲用統乞聖裁奉聖旨壽宮營建事宜既議停
當俱依擬行總督工程命卿楊兆提督工程何起
鳴催僱物料等務王友賢各照例領勅管理

議酌開納濟工疏

題為遵明旨酌開納以濟大工事照得萬曆十二年二
月二十二日臣等因恭建慈寧宮殿將來預建壽宮合

用楠杉大木題行採買及緣經費重大庫貯詘乏臣等
議開納事例以濟各項列欵候酌議另行題請奉聖旨
是這木料着該省撫按官多方採買陸續解進以應大
工急用毋得遲延誤事亦不許加派擾民欽此欽遵除
楠杉等木咨行各該撫按衙門採解外所有開欵事例
臣等謹將本部戶部見行事例及先年開納文武職官
監儒吏承等項會同吏禮兵部細加酌議停妥俱於選
法無礙相應遵旨開欵上請恭候命下本部出給榜文

曉諭在京者不分寓居土著依親探親等項俱准通狀
赴部取具鄉官印結先行給帖納銀一面移文各衙門
及原籍官司查明給與割照并通行在外各省直行令
各項人員親費銀兩赴部上納有願於在司府州納銀
并丁憂歷役未滿情願欲納銀兩者俱一體准收不許
留難罰紙致阻告納之途仍咨南京工部遵照題奉欽
依一體通行開納各項銀兩俱照季終類總解部各該
布政司及直隸府州以文書到日為始置立循環文簿

二扇將納過員役日月姓名銀兩數目逐一挨填明白
比照本部催徵料銀事例選差的當員役按季賁送本
部倒換稽查仍照例置簿一體填寫送巡按衙門查覈
所有收貯銀兩各地方官仰知大工需用甚急不得擅
留別用如各司府州錢糧不能應期催徵仍將例銀挪
抵數不行按季解部者悉聽本部叅究本部仍將納完
過各項人員類開文簿各一扇咨送吏部兵部查有詐
偽等項情弊不問已仕未仕嚴行各該官司追究詳奪

以憑從重叅治再照前項事例臣等緣本部錢糧萬分
缺乏乃借權宜之策以濟一時之急候前項大工完日
本部即行奏請停止伏乞聖裁奉聖旨是

請罷開礦峒疏

題為懇乞聖明順天心收地產以助萬壽大工以拯良
弱窮民事該順天府房山等縣民史錦等奏稱水峒等
處產有礦銀奸民掏竊獲利甚多乞要比照嘉靖年間
開礦事例設官公取所獲之利官四民六分收上可少

助大工下可拯救窮民等情奉聖旨該地方礦峒應否
開取着撫按官上緊查勘明白具奏該部知道隨該順
天巡撫都御史張國彥巡按御史張文熙各題稱會行
該司道督同各州縣正官親歷水峒兒等處踏勘似難
議開仍將各峒口照舊封固嚴禁偷挖欽奉聖旨工部
知道臣等看得銀礦之在各山封禁已久不許擅開蓋
不惟恐民競利易以釀亂且地近陵京外接邊境利孔
所在隱憂可虞況得不償失終難濟用今該巡按官會

勘立請禁止前來誠老成長慮之見相應依擬合候命
下本部移彼處撫按官將前項各峒口仍照舊封固嚴
令地方官不時巡緝毋致奸宄潛聚以啟它虞以後小
民敢有再如史錦等擅自假公奏擾者即便嚴行究治
庶奸徒屏跡地方無擾矣奉聖旨這礦峒既難開取罷

議恤運車疏

題為畿民節辦車輛萬分艱苦乞賜矜憫從長議處以
銷隱憂以固根本事該順天府尹徐元泰題稱前事欽

奉聖旨工部知道臣等查嘉靖十五年預建壽宮舊
例派取順保等府車數至五百餘輛比時尚稱不敷今
次在順天保定等府各止派車一百六十輛蓋以元宮
重大首賴於石非車不能輸運至工議將各府隨到車
輛與本部額設車輛相兼載運迄今尚未運及百之一
二本年二月二十六日該本部右侍郎王友賢詣大石
窩等處駐劄經月查催石料目覩車輛數少恐暑雨屆
期載運不前具題催僱奉聖旨這車輛着該州縣上緊

解送應用不許遲誤工部知道欽此照得預建壽宮全資於石而轉運到工必資於車今次所派車輛較之先年不及少半蓋緣先朝廟殿工興民間稱苦莫過於車而臣等深鑒往轍恐其重累貧民既捐料銀又捐事例咨給於起車之日處之不可謂不厚及車到之日又給預支以免賠累每車每運自石窩往返七日每車折四丈上下即得銀十五兩運價尤不可謂不優輦轂之下耳目自在豈有用民之力而不曲為之處者該府軫念

民瘼真若痼瘕在身謂運石派定車輛無容別議言之
誠是又惟恐大木將來仍復遺累預求停免相應依擬
合候命下本部移文順天保定等地方作速通將原派
運石車輛起此未雨之時俱限十日內催解到工將估
定應用石料刻期運完盡放歸農決不久羈以妨民業
其應給腳價查照原題隨運隨給亦斷不令時刻守候
至於川廣大木到灣之日止責成本部在官車戶陸續
載運并不復行派擾該府仍通行出示張掛曉諭畿民

有車之家各要安心作速赴工運石以後惟聽其往來
定不復行僉派時當營建之初委實惟石為艱該府亦
必同心共濟不得延緩後期以致悞事則民力不傷而
大工攸賴矣奉聖旨是以後運木車輛你部裏臨時酌
處毋得重累畿民

酌派文石疏

題為恭奉上帝傳宣等事准內官監揭帖開稱萬曆十
三年五月二十六日御前覽過濬縣并三河開取到花

斑石俱不堪用本日奉聖旨還着徐州開取有花樣堅美的來用神領山白玉石揀選好的相兼應用欽此本監於二十七日覆奏奉聖旨是工部知道欽此欽遵為此合用揭帖前去工部行令該司欽遵明旨前去徐州開取就彼成細前來應用等因到部送司除神領山白玉石即行差官督匠開取以後相兼應用外奉查嘉靖十五年預建壽宮合用花斑石三千一百塊即分於濬縣徐州採取後因應用不敷又復分派徐州濬縣等處

採辦本部各差官分投前去公同各該撫按及兵備井
府州縣掌印官選擇匠作開取解用今准內官監題出
合用花斑石共四千九百五十塊相應酌行採辦臣等
看得前項石料既奉明命於徐州開取敢不祇承德意
以壯億萬斯年壽域但念徐州地方南控吳楚北接齊
梁水陸衝繁轉輸要會實國家襟喉重地節年以來頻
遭水旱災傷小民嗷嗷待哺蠲租賑貸倉庫空虛即今
多方安戢猶恐不足以奠民生而安民志若一旦將此

數十石塊盡責之營辦不惟造辦不前耽延歲月有悞
工作抑恐經費不貲煩擾地方民窮怨起隱憂可虞其
如皇上愛養元元戢寧方夏之意何況美材難得即今
并工盡力於此一處求之恐亦未易以取盈也查照嘉
靖十五年皇祖朝預建壽宮需此花斑石料亦於濬縣
三河等處兼取選用至今在寶城殿宇者一體堅美此
皆臣等耳目之所睹記是先年採取未嘗獨於徐州而
濬縣等處亦在所不棄也茲者大工取用此石合無再

照舊例將內監開取石數三分為率徐州量派一分其餘仍於濬縣三河遵化等處着落各該地方官親至出石處所開求前石務要花樣純全體質堅潤本部仍分委能幹官員題請前去各該地方會同彼處撫按及司府州縣掌印官選擇高手匠作嚴行催督務照發去尺寸各細心揀選開取其不堪石料不許混開開成選中即在本處琢磨成細上緊陸續差官管解前來應用庶石料四集大工易舉徐沛凋疲之地不至重擾我皇上

億萬年之慶彌衍於無疆矣奉聖旨徐州地方既稱凋
疲這石料准開取一半解用其餘濬縣等處協辦合用
工食你部裏還與設處毋致擾累小民

議取官木以濟工用疏

題為欽奉聖諭事案照預建壽宮工程重大節該本部
題奉欽依楠杉大木鷹平條槁行川廣蕪湖等處採解
其松木五萬九千五百餘根例該召商買辦隨經批給
鋪戶耿應禎等分投收集續據各役告稱張家灣等處

并無客木即往山西產木處所收買經過五臺縣河門口地方見有漏抽入官長散木四千餘根松木二萬八千餘根召人認買變價濟邊又有在山內木大小六萬餘根告乞查處等因隨該本部移咨山西巡撫衙門委官查勘回稱五臺縣河門口堆放木植果有三萬一百九十二根又據部差舍人吳大經稟稱本處木料除河門口外各山尚有六萬餘根又據本處客商李希夔等告稱五臺地方見在松木三萬有餘乞批拽運等情臣

等看得大工物料節奉明旨着上緊辦造川廣大木雖
已派採而柁鼓松木召買頗難各廠正值匱乏尤宜急
行措處今五臺縣既有存積木料數多又經咨行山西
巡撫衙門查勘前來相應題請合候命下本部移咨山
西巡撫都御史轉行該司道官督同府縣等官即將前
項入官松木照依咨開堪用數目給文差官管解赴部
以濟大工之用其水脚酌量地里估計合用若干就於
該府收貯本部事例銀兩募夫拽運前來不得分毫派

擾小民其各商原報在山松木聽令原領有本部批文者許其入山自運前來不得阻勒解到之日仍聽本部揀選照估給價收買應用庶木料有脩而需用不乏矣奉聖旨是

請罷助工之令疏

題為傳奉上旨事該內閣遞出揭帖該文書官宋坤口傳聖旨壽宮工程浩大未有次第應用錢糧數多聞嘉靖年間朝殿等工撫按官各進有助工贓罰銀兩工部

還查見在錢糧有無足用助工事是否可行明白來說
欽此臣竊以帝王舉事貴圖億萬年之業尤貴得億萬
姓之心大業集而民心不失斯保世滋大享祚靈長之
道也我皇上乘乾履泰鼎建壽宮中外臣民翕然欣戴
其於億萬年之業固已預圖之而於億萬姓之心亦俛
得之矣臣等職司邦土義切急公即帑藏空虛未敢言
訕而委曲措處亦已用至五十餘萬金矣今元宮重地
幾已垂成而殿廡諸工尚無次第乃聖心遠慮俯詢錢

糧又欲倣嘉靖年間助工之例以足工用臣等仰奉睿
謨亟宜乘此清閒援例請助以濟大工但臣等反覆深
思有未敢以遽請者蓋海內地方與昔殷厚不倫又畿
甸山陝災沴頻仍大江南北洪水橫溢而蘇松兩浙復
以杼軸苦湖貴四川復以徵材苦江西以陶器苦河南
以版築苦滇粵以用兵苦諸邊以備寇苦撫按諸臣仰
承德意不敢多事以擾民而所貯贖鍰些須藉以佐公
家之急故外之不繼且內焉是資甚則有咨行各部求

權宜以處者又其甚則有請之內帑求頒給以濟者此
豈不知廟堂之上財用之不足哉誅求已徧計無所出
耳茲一旦而以助工之詔傳之四方撫按諸臣其勢不
得不責之有司有司未必皆賢萬一奉行未善借言明
旨公肆科罰株連波及逮繫責追累累道路竊恐大工
未必濟而且重遺我百姓困也不大為聖心所弗安乎
臣等區區之愚伏念預建壽宮乃國家重大吉典正臣
子畢力供事之秋必使財不費而工成役不勞而事濟

方為忠愛之完畫恭查本部庫內積貯尚有事例銀六十萬金儘足目前支費將來若復難繼自當查例上請借用惟期不至悞事臣之責也何敢他諉伏望皇上俯從本部之議容臣等漸次經理務在勉圖成功光弼盛典無以費鉅而煩宸慮無以財詘而藉外餒則億萬姓之心膠不可解而億萬年之基亦因以永固而不替也臣等不勝惓切祈懇之至奉聖旨朕念工費浩繁財用不繼欲照嘉靖年間事例權宜措處你部裏既這等說

且着用心經理如有不敷預先查議題請以濟大工

請增大料運價疏

題為議處大料運價以甦車役以重吉典事該督催物料本部左侍郎王友賢咨據車戶楊福等告稱前事臣等竊謂役民以力者必使常有贏餘俾利有可趨不必驅民以法而民自樂於從事本部向於車戶一欸當大工創議之始未暇計其裝運大料多用騾頭搭掛之苦漫然責以拽運雖比照舊時會估量行議價中間委屬

虧累如大石窩運價僅足供草料飯食之費如遇改轍車搭掛即亦稱困至馬鞍山運價則又不及大石窩遠甚況今明樓全料俱在本山尚未運到十分之二三衙門車戶寧受比責竟不肯往役垂涕訴告咸以大料價少虧苦為辭若不及今速處將來必致悞事合候命下本司掌印官仍會同監視工程并廠庫科道官及見工司官將大石窩大料自十一丈以上至十六丈俱各比新估量加腳價馬鞍山運價即照依大石窩事例一體

給價以濟燃眉之急其餘大工應用一切大料等項運
價原無定估者容臣等臨時酌處給價務使車戶不致
虧苦通候大工完日即行停止後不為例如此不惟京
灣車戶樂於載運即四方車戶慕利而來者衆矣奉聖
旨是

請廣鼓鑄以佐大工疏

題為錢價騰貴工用不便懇乞聖明俞允量行添鑄以
濟大工事該提督工程本部左侍郎曾同亨咨據見工

本部郎中徐泰時呈稱前事臣等看得國家之設制錢所以足國裕民頃者本部遵奉欽依鑄萬厯金背錢十五萬錠每積至三百萬文恭進內府一次又以六分之五咨送戶部折放官軍俸糧此錢一布小民喜於行使致令嘉隆舊錢一時停格不行誠以皇上制錢輕重適宜輪廓龐厚利於民用也乃此錢原鑄有限流布民間未多即京城內外已苦錢貴況大工夫匠日聚幾萬朝夕飯食交易利於用此錢而苦於不足亦理勢所必然

者既經提督侍郎曾同身咨議前來欲添鼓鑄以便工費誠與臣等所見相同合無即從所請恭候命下臣等行令寶源局原管鑄錢員外郎沈修除將欽依限鑄錠文照常鳩工成造先後陸續恭進內府并續送戶部外本部另動節慎庫事例銀兩另僱爐頭量行添鑄專濟大工每月一次約二百萬文解發工所令其搭銀行使候工有次第夫匠數少即行停止後將動支過事例銀兩若干鑄過萬歷金背錢若干文造冊奏繳備查再照

目今新鑄制錢每銀一萬兩買辦銅錫煤炸及雜料工食該鑄錢七百一十八萬文而民間行使率以五文抵銀一分是銀一萬而得一萬四千兩有餘之用也況錢數漸添銀易倒換物價且將漸平足國裕民莫便於此伏乞聖明俞允勅賜施行大工幸甚臣等幸甚奉聖旨是

議處協濟大工疏

題為大工殷庫貯匱乏乞賜議處協濟以紓急用事

據監督節慎庫虞衡清吏司主事徐榜呈稱照得本庫
實在應支壽宮銀止十萬餘兩事例停止款數既多僅
存數條輸納漸少而四司節年料價各省直拖欠不可
勝計即今內外大小營造工費無筭前項銀兩不敷若
不預為區處誠恐臨期有悞支放呈乞酌議等因到部
送司案照預建壽宮工程重大支用浩繁先該本部條
議工費銀兩先儘庫貯見在料價及開納事例銀陸續
支用如有不敷查照嘉靖年間舊例題請戶兵二部協

濟等因節奉聖旨壽宮營建事宜既議停當俱依擬行
欽此已經通行欽遵訖今該前因相應議處案呈到部
伏念臣等猥以疎庸荷蒙簡任每見工費浩繁輒日夜
焦思與內外諸臣悉心計議初到部涖事日庫內收貯
事例等項銀兩猶有三十萬之積臣方竊計各省直應
解本部錢糧或可陸續接濟不意數月間一應工料支
用外所僅存者止有前數在各省直應解料價等項銀
兩又且不多臣始不覺驚惶以如此大工之費臣不能

預為計處致有此燃眉之急臣誠無所逃罪臣等復詳查本部工費錢糧先年原無定額遇有傳造興作臨期料計數目酌量分派各該地方徵銀解部用剩存積是以庫內間有餘羨足脩緩急自嘉靖三十五年以後工作頻興當事者因約一年之費著為定數分派各省直名為料價每歲額數止五十餘萬兩并匠價等銀通計不過七十餘萬即今川廣大木抵灣應發運價鷹平條槁價應找給與夫各司應支發銀兩在營繕司除修過

翊坤宮井引德殿等處方在筭給實收及寶善門玉熙
宮天壇重城都城千步廊房等處修理支費外若年例
之修倉磚料司禮司設門官監經廠工料與夫苫蓋大
木板枋約該銀二十餘萬兩虞衡司除見辦銀作局水
銀等料寶源局鑄錢支費外若年例之盛甲王恭二廠
兵仗局寶鈔司乙字等庫龍瀝等紙酒醋局料價燒造
磁缸買辦硝黃以至脩理大庖廚約該銀十五萬兩都
水司除傳造鋪宮婚禮針工局冬衣鋪蓋併見今筭給

川漆價銀等項支費外若年例之器皿六科廊尚衣
監金簿供用庫柴炭板廟司設監乾清等宮龍床光祿
寺小紅杠丙丁二庫串五絲御馬監白麻馬槽椿料價
織染所藍靛蘇木等料約該銀三十萬兩屯田司除見
應支壽宮錢糧外若年例惜薪司光祿寺之柴炭內使
折價巾帽局靴料御用監御馬監銀作局織染局料銀
約該銀三十萬兩通查各司一歲支費不下百萬兩出
浮於入以致移東就西不勝補湊之苦至於各處未解

料價及事例銀兩在浙江江西則以織造燒造留湖川
貴三省則以採木留順天大名徐州則以採花斑石留
淮揚請留脩堤河南請留修府第蘇松請留造方磚陝
西等處請留賑濟存多於解以致取彼與此日以那借
為事今自壽宮而下內外營造萬不容緩而各項支費
毫不可缺欲照往例加派小民則各省直重罹災困皇
上方蠲內帑以賑濟之臣固知皇上之心所不忍也查
得嘉靖年間建造慈寧慈慶宮及預建壽宮題行戶兵

二部動支草料子粒銀三百四十餘萬兩協濟建造殿
堂朝門等工該禮部等衙門會題借支戶兵二部餘鹽
課銀缺官柴薪等銀四十萬兩及光祿寺召商買料積
餘銀二十萬兩廟建採木等工費又各支南京工部班
匠料銀及南贛橋稅廣東椒木香料鹽引雜貨等稅亦
以國家之費取足於國家之財而維時當事諸臣亦不
忍坐視同室有待哺之困不篤共濟之義如此也即今
壽宮工料之費已用過八十餘萬而未完工程尚多其

費蓋未可預計外而若臨清之加派磚料瓜儀之召買木植以及近日各府庫之墻垣房舍暫議停修者又不與也先該臣部具奏如遇錢糧不敷之日臨期題請議處等因奉聖旨朕念工費浩繁財用不繼欲照嘉靖年間事例權宜措處你部裏既這等說且着用心經理如有不敷預先查議題請以濟大工欽此欽遵今茲萬分缺乏之時苟無權宜措處之計有悞於工程匪細伏乞皇上軫念大工繁重及年例額派并各宮修整事非得

已勅下戶兵二部查例共行協濟惟復以戶部餉邊賑
饑支用不足似難照常協助特令兵部將缺官柴薪子
粒椿棚草料馬價等銀共發四十萬兩南京工部匠班
料價葦課等銀先該本部題發二十萬兩充四川採木
之費後因停免三運前銀未經給發乞今再量動十萬
共湊三十萬兩即行解部以濟目前之急此外客臣等
將先年議開各項事例見今停止擇其無礙選法者并
新議一二款會同吏禮兵三部議行開納以備將來不

繼之需如工費少足即行停止恭候命下本部咨行各該衙門照例議處濟用其應納事例另行開款上請臣等非不知國家之財當為國家蓄之且事有司存何得蹈損彼益此之嫌顧事至於無可奈何勢出於萬不獲已故不得不循例以請也再照各處料價原為本部年例供應之費開納事例原為預建壽宮之費前此曲從各省府借留蓋出一時遷就權宜之意殊非事體伏乞天語叮嚀各撫按嚴令有司脩查二項銀兩除十五年

以前奏留者作速截數扣解自十六年為始以後俱不
許擅自議留及聽其逋欠不行催解如有仍踵前弊容
臣等并該科查叅處治庶目下之用少紓而將來之工
費有賴矣奉聖旨是大工繁重錢糧不敷着兵部於太
僕寺南京工部於葦課等銀各動支三十萬兩協濟
覆留開納銀兩以佐荒政疏

題為敷陳救荒要務以濟時艱以圖永賴事准戶部咨
稱前事臣等看得山東道監察御史黃正色題稱浙直

江西河南山東山西等處地方災荒要將本部見行開
納事例頒示天下令納級納監人員俱輸粟本處聽憑
有司隨時賑濟一節為照本部開納事例蓋以內外大
工經費甚繁而各省直年例料價連歲以災荒徵解不
前庫藏日匱不得已而酌有前議然各款開自十二年
三月至十三年五月即歸并戶部一十七款停止一十
六款十四年五月又停止七款至十五年九月以來庫
貯萬分匱乏題奉欽依新議增復數條今准吏部咨又

將光祿寺署丞京衛經歷各行停止所存款數未多近
日來輸納益少内外工費正慮不敷今御史黃正色備
陳災傷要將本部事例留賑饑民無非恤災救荒以廣
我皇上惠養元元至意但前項銀兩在浙江蘇松徐州
等處俱以織造採石題准留用陝西年前已留備賑一
年近該戶部始題議令照舊納解本部無容別議外及
查陝西北直隸等處近來得雨麥稻有收穀種復布小
民頗有更生之望惟山東濟南東昌兗州府與河南開

封府各地方尚稱未雨今若一槩議行存留恐以無多
事款行之有災地方未必真濟小民而有司借此復議
盡留則內庫將益空詘是以照養虛名而耗不可已實
費也合無將所稱災傷地方行各該撫按官備勘所屬
府州縣果係災傷重大至八分以上除戶部賑恤不給
又或該地方別無從措處不得不留此以救目前之急
者聽各分別州縣明白具奏以憑議覆定奪其被災稍
輕地方仍各照舊收銀解部濟工恭候命下本部移咨

南北直隸并山東河南江西各巡撫及咨都察院轉行
各該巡按御史一體欽遵施行庶幾國用民生兩有利
賴矣奉聖旨是

請減蘆課疏

題為懇乞聖慈寬減蘆課以紓民困以廣德意事該巡
撫應天等府地方都察院右僉都御史郭思極題稱前
事欽奉聖旨工部知道臣等案查得前項蘆洲原係五
年一丈萬曆九年該南京工部冊報沿江一帶洲場原

額一百七十一萬一千八十二畝課銀四萬一千九百七十八兩有零新丈增出洲場二十九萬七千六百七十畝新增課銀二千四百九十餘兩已經題奉欽依照數徵派在卷又查得詔書內一款一各省直清丈田糧如有虛增地畝及將山坡湖場陞則派糧貽累軍民者准與更正欽此為照則壤成賦經野大端今沿江一帶蘆洲日當巨流間有淤灘新出者即有沖坍新沒者以此抵彼數難頓增乃近年來承丈官員惟知搜括盡法

遂爾驟加課額此不惟目前小民苦於徵輸抑恐將來
國課動至拖欠既經該撫臣具題前來援引恩詔請免
改正委應依擬但節年新增蘆課徵收諒已在官況已
奉有蠲免分數難復議豁其九年新增課銀合無恭候
命下本部移咨南京工部督理蘆政主事及轉行各該
巡按責令各州縣掌印官從公覈實果係本年虛加即
與改正徑自明白奏請除豁以後每遇五年一次丈量
經管官員務要虛心踏勘的確劑量增損不得故求浮

額以病民生亦不得濫行豁免以虧國課庶課銀約有定額而民困可紓矣奉聖旨是

請免新增紅羅大炭疏

題為歲辦錢糧不敷懇乞聖明停免增添木炭以蘇商困以重邊防事該惜薪司署司事御馬監太監陸敬等題稱工部易州山廠採燒辦納長裝木炭五十萬觔專候乾清宮并聖母兩宮金盃及妃嬪宮所潞王公主等處日用時不敢缺乃額辦原少用處數多虞至匱乏無

從區處伏望年增添三十萬觔接濟供應奉聖旨這木炭既供應不敷准照數增辦應用工部知道欽此臣等看得長裝木炭專供上用每年額派五十五萬觔行易州山廠督併各商辦納揀擇修整不比小炭易辦今惜薪司具題乞要歲增派三十萬觔奉有俞旨臣等敢不仰承明命遵行增派以裕供應但易州山廠地近邊鄙民生疲苦燒造大炭林木日久砍伐已盡近年以來各商至越關涉險數百里外採運木植燒造交納萬分虧

累該易州主事徐即登具呈前來方欲具題議處以少
蘇其困憊以昭我皇上安戢地方愛養元元至意今該
監據請增添前數殆踰一年年例錢糧之強半不惟積
累貧民力不能支山場遠地料亦難辦以四方招集渙
散之商應一旦加添重大之役恐適以速其逃亡轉貽
拖欠也竊謂該廠大炭額派有時即十餘年來未聞稱
不足用固皆我皇上儉德鑒於成憲撙節有方所致今
辦納雖難在易州廠接年拖欠亦自陸續報完在紅羅

廠年額實未短少何為輒至不足陡有三十萬之加也
且見採地方既稱無料若復加添必取之沿邊山谷山
木漸至蕩然是邊脩藩籬盡撤向來闕禁之不敢稍弛
謂何乃可不為之深長慮也伏望皇上軫念邊境疲民
採燒前炭艱難萬狀及念邊塞重地林木借以為險於
戍守大有關係俯將額外新增觔數特賜停免乞勅惜
薪司查將此項年例大炭仍照往年額數愛惜支用不
得驟議增加果如供應不敷即於紅羅廠白炭內揀選

進用供應自可不致缺乏而疲商庶免重累矣邊地幸甚臣愚幸甚奉聖旨這所奏知道了還遵前旨行

請減歲增紅羅大炭疏

題為歲用大炭增加數多商力不支懇乞聖明量賜裁減并議汰冗員省鋪墊勤收納革一切夙弊以便供應事先該臣等題覆惜薪司署司事御馬監太監陸敬奏稱請增大炭乞恩停免一節欽奉聖旨這所奏知道了還遵前旨行欽此臣等竊惟大炭之設其來已久接年

供應未聞不敷今一旦准加添至三十萬觔或以近未
如祖宗朝專取供御前用耳仰惟我皇上儉德光昭動
恤民隱近如減光祿膳羞江西燒造磁器浙直織造段
疋何非加意窮民乃茲大炭獨未蒙俯聽免行加派者
豈以山厰林木取辦固易乎然上供事有言之似易
而勢實不能支則莫如今日此大炭蓋其用一色甲木
近地不可得商人採辦越重關數百里外裹糧歷險上
下山谷窮數日之力纔得一肩荷背負至燒出成炭短

小條細皆不中選照式起解十未獲一此採辦之難也
及輸京師須借車輛千里馳驅動輒磕損業已近厥復
多棄置又復不勝賠累之擾迨至報官上納守候日久
方得盤收多經蹂踐奚止壑缺往往轉取後撥填補眼
前少加羨餘數亦無幾今漸增殆十之八一年名為五
十萬觔其實已暗增至八十餘萬觔此又包辦之難也
鋪墊秤頭已足輪收內官又各索茶席錢火者猫食亦
求數簍價少不如意一藤條徑碎水磨合式炭幾簍以

廢棄物盡沒厥庭此又其過門之難也且原額掌厥貼
廠等官一廠不過數員今漸加至百數十員總計八百
餘員矣十羊九牧各有分例每上炭一撥鋪墊不貲尚
復私索抑勒誠有如科臣所言而未盡者此又非濫費
無告之難耶夫以舊額錢糧上納之難已如此商民苦
不聊生業思逃亡即仍舊額猶恐時詘舉贏未必年年
完納乃又復從而加征至如此之多的知力不能為勢
不能支矣臣即今一時勉強應命緘默弗言以致日後

逃亡益甚正額且虧乃咎臣言之不早臣固無所自文其何以收東隅之失使公家雖稍苦民而竟實獲增添利益哉逆知其必不然矣伏望皇上軫念邊氓困苦新加派數的不能辦科臣并臣等先今具奏毫不敢欺特將先項大炭姑量加數萬觔後不為例或將三十萬觔分作三年帶徵總扣足數即行停止恭候命下臣等謹遵裁定數目查照定價給發銀兩一面行令易州廠主事一面咨彼處巡撫都御史轉行附近州縣招選殷實

商民寬其別項差役聽令廣開山場多方採燒自萬厯十四年為始將新加炭勦隨年例大炭依期上納仍乞勅下司禮監行惜薪司掌印官除該廠額設掌貼僉書外亟將賣緣乞添冗員議行大一汰處或只令其本廠帶銜不得與收放之事以困貧商更嚴諭該司要知大炭寸寸皆民筋力脂膏加意愛惜只照舊例專候上用其供匪頒欽賞准令止用揀選堅實年例常炭仍申飭該廠減鋪墊禁索需平勦秤勤收納一洗殘害夙弊使

各商得易完辦錢糧由此紅羅一廠推而至外西南北
廠俱准惜薪司新掌印官陸敬欲減工費銀兩新議及
其內廠裁定收納事例凡柴炭一廠務期一日收完不
許似前阻攔指勒延遲月日以滋弊端充溪壑欲行令
各廠一體遵行外仍容臣移文保定巡撫都御史着落
近廠州縣官各種應用橡木以期數年後取用更許僻
遠山民將自燒炭徑與廠商交易以濟目前採求之
難於催科之中寓撫字之意欲取之不盡先用之有節

則我皇上仁慈恭儉至德宣但畿輔小民罔不瞻仰感戴而休養生息之恩將延及邊關內外殆莫不喁喁仰誦聖明鴻號熙於無窮眷命綿於維新宗社無疆之慶端有在矣奉聖旨這添辦大炭你部裏既說邊商困苦採納艱難准每年量添十五萬觔候積剩足用具奏停止該廠冗員及收納事例着司禮監選差廉幹內官會同該司掌印官用心查覈酌議裁減停當來說

此疏具稿正堂以部科兩抗疏拂上意力命停奏恐取譴責竟不畫題愚走白三相公亦面止之謂旨如徑內

批恐閣中亦難收拾愚對以為職既奉旨留司久任完
大工事則何忍年年見中外諸商之苦諸商每四年會
科道一審編京中大室一次及之有至四年而不傾家
逃竄者乎如此不已恐戾祖宗取彼填實京師至意此
疏原非出堂上即將本職調外任罰俸一年皆所不恤
相公壯之徑冒昧具題上初震怒命東廠太監張鯨亟
緝奏語真妄將深加罪禍且叵測繼從監厥見勒令衆
商各自供揭控弊乞命草單曰始以為外衙門故飾詞
抗拒該廠積弊固以至此極乎乃降斯旨尋准欽差司
禮監官覆部五廠中官共汰五百六十八員名外每廠
柴炭年不下十撥每撥鋪墊遂減五七百金總計五廠
一次收納較常輒減費以六十計其不中式者又准商
人領出不得沒官秤頭亦平收期復速而商人始得免
賠累魅息有望矣記此以見聖明乾斷非左右中涓所
能惑
動云

請更大炭山場疏

題為歲用大炭增加數多議處更撥山場以便採辦供
應事該保定巡撫右僉都御史賈三近咨稱易州兵備
道右叅政兼僉事余國賓呈議前事又據督理易州山
廠主事張新呈同前事臣等看得易州大炭係供御用
日不可缺但往時年例只五十五萬觔山場轉採漸遠
已稱難辦今又陡加十五萬觔則至另議撥山場猶慮
弗給亦勢之必至非過計也所有勘定前項車頭港等

八處既經撫院督行該道會官查議前來事稱妥當相應依擬題請合候命下本部移咨保定巡撫及咨都察院轉行巡關御史通行該道會同該主事將前項勘定山場定立界址即設立窯座每年照例明開呈部印給批文責令鋪商窯戶在界址內採辦青信白棗等申木燒造大炭依期解納其餘雜木根株不許亂行砍伐自取罪譴守口官軍亦不許與鋪商故分爾我挾私妄言亦不得通同商民偷行混砍盜賣致損邊關藩籬其伐

過山場若椒樹溝等六處及今新撥給地方但有採過
甲木身幹各嚴行榜諭守口官軍務要加意巡守長養
新枝以護成材聽備採用每季各地方文武官吏遞不
致傷伐甘結分投該管廠道衙門查考如有奸徒盜砍
私燒小炭者許守隘官軍及隣近窩戶人等或擒或告
送廠道衙門以憑懲究有故縱者事發一體治罪具議
招民種植甲木一節本部先年已曾有文行令從長議
處在本道亦曾准該府議將砍伐空山即令各口官軍

隨時補栽今徑欲該廠廣行栽植及時灌溉期五年後永省採燒禁山查照各處山塲原不係該廠主轄該廠庫藏除辦年例大炭無復分毫官銀存貯可以支給藉令招商種植其地方當坐落何所以後此山塲即屬該廠管理仍聽司道節制近而地主芻牧遠而官軍邏巡有無掣肘得博實効與否容臣等再咨該撫院督令道府會同該廠再加酌議明妥及合用錢糧從何措處毋事虛文以滋糜費推委悞事另行具題欽遵奉行再照

此歲辦大炭在祖宗朝皆取足原額觔數即我皇上御
宇十三年以前亦未嘗稱不敷用前歲偶緣商力不支
積有拖欠該惜薪司具奏乞加添三十萬觔該本部奏
請減免奉聖旨這添辦大炭你部裏既說邊商困苦採
納艱難准每年量添十五萬觔候積剩足用具奏停止
該廠冗員及收納事例着司禮監選差廉幹內官會同
該司掌印官用心查覈酌議裁減停當來說欽此欽遵
年來因收納寬平冗費半減貧商戴恩竭力輸納蓋聞

逋欠者已漸完而加添者且源源至矣積剩雖未敢必
足用似可逆觀況今畿甸旱荒甲木益少禁山頻伐藩
籬漸撤不止倍目前難繼之憂抑且重日後叵測之患
伏望陛下鑒臣愚忠勅下該司將此大炭念料不易辦
加意撙節只取用供應御前餘者量賜裁省仍望渙發
德音將來歲加添數目再量行停減若干觔以寬採辦
山場庶免旦旦之伐或亦可省以後更撥之擾蓋此炭
尺寸圍長有制刮膚水磨十不選一但省納千觔則當

省伐山木幾千省納萬觔則當省伐山木幾萬況此山
木藉以長養永峻邊關保障之防而惠澤覃敷其所以
培植困商之命脉登受山川之靈貺殆且無量矣伏乞
聖明採納地方臣民幸甚奉聖旨是大炭歲用不敷難
以停減還照前旨行

請正肅王葬價疏

題為喪禮乞恩事該禮部咨稱前事臣等奉查先年親
王造葬銀兩數目原無定例萬厯七年該本部議定親

王葬價或王或妃有先薨逝者給銀三千八百兩後薨者給開塋工價銀八十兩冥器喪儀銀六十八兩八錢八分郡王如係帝孫或王或妃有先薨者給銀三百五十兩如係王孫減半造葬鎮國將軍以下俱遵照嘉靖四十四年例盡行裁革已經題奏欽依俱各通行遵照在奉又查得肅王縉熾以肅懷王從叔由輔國將軍進封襲王止支輔國將軍祿其葬價似應酌議今恭看得各王府恤典親郡王大有懸隔固以爵祿為厚薄亦以

親疎為隆殺今肅王緡燼以旁支進封而歲支輔國將軍祿米僅止千石分既殊於親王親亦別於帝孫其造墳工價若遽給銀三千八百兩似於典制或過合無將緡燼比照親王葬例銀兩量行減半其餘差官營造銘旌紵絲金簿龍鈎一如親王體制頒給但恩典出自朝廷應否如議減給惟復別有定奪伏乞聖裁奉聖旨是該府係親王葬價着照例全給

請正德王葬價疏

題為乞恩喪禮并檢舉事該巡撫山東右副都御史李戴題稱前事臣等奉查親王造葬價銀原未定有額數至萬曆七年該河南巡撫都御史周鑑題為申明宗藩條例以杜冒濫以飭法紀事內稱親王造墳工價有司曲意阿承甚有多費至萬餘兩要乞查照大明會典規制估計工料夫價實該若干著為定例該本部查得會典開載親王造墳規制工料僅一千九百餘兩而夫匠之價大約與物料等及行據河南布政司冊報崇王妃

宋氏造墳工料夫匠等項共用過銀三千八百兩似合
會典規制即行議題以後親王或妃薨逝造墳工價俱
只給銀三千八百兩於該藩封內郡縣查括庫貯無礙
錢糧給發該府自行買料顧役造墳不許派及民間一
錢亦不許沿途及墳所搭蓋棚殿擾民如該府有分外
瀆擾者聽彼處撫按官將輔導撥置員役叅究治罪有
司濫行應付者以贓論黜覆奉欽依通行各該撫按欽
遵外又查得萬曆七年後周王在鉅衡王載圭晉王慎

銀藩王恬煖秦王誼湍岷王定燿嫡妃王氏通該本部
照例題給銀三千八百兩各該布政司如數造冊奏繳
並未有奏請加添銀兩事例叅看得德王靖館造墳工
價先該本部題遵明例照會山東布政司如數給發應
用該府輔導官員即宜欽遵明命聽領價值却乃故違
新例分外瀆擾以致司府等官失於檢查而撫按等官
亦遂轉為奏請本部正欲具題叅究續該撫按自行檢
舉相應議覆查照該王府葬價例外復請增派數多此

自長史司官吏朦朧情弊乃各該承行官吏失於檢查
輒為轉呈撫按罪委難辭而撫按亦即據以奏請亦與
有責但查得大明律內一款凡公事失錯自覺舉者免
罪其同僚官吏應連坐者一人覺舉餘人皆免罪所據
前事既經檢舉具奏前來除吏楊承宣依律免罪該省
布政司濟南府經該各官似應照例一體免罪其撫按
官事雖偶失覆查文已曾經屢駁相應免究該府長史
司官吏託辭舊卷明屬故違法應罰治合無恭候命下

臣等咨行山東撫按衙門將德王翊鎬葬價止照原題
事理給發該府自行造葬額外加增銀兩悉行停免原
勘詳奏准行註銷其撫按并經承官吏俱姑免究該府
長史司長史合行罰治該吏仍聽撫按提究發落庶法
紀明而恩禮協矣奉聖旨是既檢舉各官依律免罪該
府長史着罰俸一箇月

請復靖江王恩恤原例疏

題為懇乞天恩循舊賜卹以廣聖惠事該靖江王長子

履燾奏請前事查嘉靖四年七月內准禮部咨開靖江王庶長子邦寧奏父靖江王經扶病故已經本部覆奉欽依行移該布政司照郡王減半事例給銀一百七十五兩造葬去後嘉靖五年七月內伊子邦寧奏復全價本部議得洪武年間靖江王府係與秦晉同日受封比之親王雖若有間比之親王府下郡王亦頗不同若照郡王墳價減半給與似非所堪合無照依先年郡王造墳全價事例給與不必減半該布政司委府佐官一

員督理等因覆奉世宗皇帝聖旨是准照郡王造墳全價事例給與銀三百五十兩欽此欽遵在奉及查萬厯十年五月內准禮部咨開靖江王長子履燾奏父靖江王任昌病故題遵郡王例減半造葬本部覆奉欽依行移廣西布政司支給半價造葬去訖今又該禮部咨送前因為照本府宗派自國初分封歷世以來備沾優渥原與親王府下郡王禮數有差今於墳價止照郡王近例減半給與委非所堪既經長子履燾具奏補給前來

又經該司查有前例相應題請合無恭候命下本部行
廣西布政司照依先年郡王墳價全給事例給銀三百
五十兩送與該府應用本司仍委府佐官一員督理完
工其冥器喪儀等項照例一并送用畢日該司將送過
價銀數目造冊奏繳仍具數呈部查考但恩典出自朝
廷非臣等所敢定擬伏乞聖裁奉聖旨是

復增宗正葬價疏

題為追述功德懇乞轉奏俯賜卹典以光泉壤事該禮

部咨覆河南撫按衷貞吉等會題周府宗學宗正睦櫟
卹典欽奉聖旨睦櫟學行素優依擬加祭給葬以示激
勸臣等案查宗室舊例鎮國中尉墳價銀五十一兩八
錢六分遞是上下數有增減於嘉靖四十四年間概行
停給各題奉欽依欽遵在卷但今看得宗學宗正鎮國
中尉睦櫟病故所有造墳工價雖例在停給為照本宗
行滋樹德志樂為善化育先嚴平身範文章早擅於藝
林誼篤天倫學窺理窟既奉明旨加祭給葬若止給中

尉墳價似亦未見朝廷崇德尚賢殊渥合與輔國將軍
葬卹銀九十二兩五錢行移河南布都二司軍三民七
徵給該府依例造葬庶親賢之化並隆而宗藩人人知
勸矣奉聖旨是

請慎戚畹卹典疏

題為懇乞聖明遵祖制慎卹典以光聖治事該錦衣衛
帶俸都指揮使鄭承憲奏稱伊父封驃騎將軍鄭福病
故乞照永年伯王偉指揮王鑑恩例賜給墳地續該禮

部題覆欽奉聖旨酌量給墳價銀五千兩自造不為例臣等仰惟皇上之意必以承憲親臣重違所請而墳價之給示墳之不應造也又必以親臣之父例無給以墳價者而今其自造不為例示例之不可自今始也臣等即宜將順德意夫復何言第祖宗以來二百餘年原無帶俸指揮為父請乞祭葬者且永年伯王偉身都貴戚戴聖夫人保翊聖躬人情典制均宜造葬而承憲安得援以為例況以從來所未有之卹典一旦加恩至五千

兩之多寧不駭四海之觀聽啟私門之妄覲乎臣等上
為國家愛典常而下為承憲計久遠則此墳價者踰禮
越制是不可不杜其漸也昔在開元中用竇孝諶故事
葬王皎而侍中宋璟力爭以為不可玄宗嘉納之至今
贊美不置皇上遠追堯舜近法祖宗陋唐帝不為而於
承憲之請獨不可以大義裁之耶事關職掌臣等不敢
緘默伏望聖上將准給墳價特賜停止庶國家典制不
以一人廢而以保全承憲永享爵祿者其端亦不出此

矣奉聖旨這所奏知道了還遵前旨行

國朝卹典文武葬價俱有定例惟皇親每出聖裁亦但本身而止都指揮使鄭承憲為父乞恩原為非分乃巧於為說不曰討葬價而曰討墳地又有附援曲為力請是以賜予過厚至於如此該司再呈堂抗疏請減奉聖旨卿等說得是但鄭承憲身後墳價已不許再來乞請了還照前旨行欽此欽遵不得已咨同戶部措給莫之能挽矣當時各部科肯一體共爭至再至三或亦仰動上意庶稍從減顧但一言而止戶部復經目本司為推諉不其難哉乃嗣後承憲死其家更營謀造葬而上終不聽可謂有乾斷已人臣義顧可無和衷與

請告疏

奏為奉差事竣尋感危疾懇乞天恩俯容在籍調理以

延殘喘事臣山東濟南府德州德平縣人由官生隆慶
四年除授中軍都督府經歷司都事歷太僕寺寺丞戶
工二部員外郎郎中陞尚寶司卿萬曆十八年十月內
奉命前往周府沈邱王致祭治喪事畢臣以九年於外
不遑將母便道回籍恭候欽依限期欽遵復命不謂臣
素患便血股病入秋偶受風寒痰喘脾泄不止臣有祖
母王氏見年八十有八日撫摩臣惟恐臣不蚤愈臣以
上慮欽限期迫勢難戒行下為親憂過服藥餌轉致邪

火益熾頭目暈眩動欲昏仆左股痛楚寸步難移屢延
醫生吳茂章等診視僉謂臣受病深沉非旦夕所能調
治須俟經年底望平復伏念臣世受國恩過蒙拔擢頃
以供役壽宮濫冒卿列再叨加服色俸級顧十年部署
徒效馳驅而三載掖垣殊慙尸素仰茲高厚之恩真捐
糜不足為報也乃今進退如此狼狽樞趨闕廷未可卜
日安敢不披瀝衷私於君父之前丐寬假恩以慰釋臣
祖母心以徼全臣微軀命也查得原任太常寺少卿徐

一櫬光祿寺少卿程奎俱以奉差事竣患病奏乞回籍
調理荷蒙聖慈俱俯俞允今臣事體實與相同又臣少
喪父母親無伯叔更多二豎有哀年祖母之依戀伏望
皇上憐臣遽難動履之病兼抱萬分不獲已之情勅下
吏部查照事理題覆將臣准令原籍調理庶殘喘或可
苟延倘幸不即填溝壑猶有日效犬馬奔走圖報稱於
萬一也職不勝悚懼控籲懇祈之至奉聖旨吏部知道
覆奉聖旨是


請乞祖母恩卹疏

奏為遵例陳請懇乞天恩俯賜卹典以光泉壤事臣祖
父致仕太子少保都察院左都御史葛守禮禔躬清謹
夙受我世宗特達之知嘉靖三十四年以南京禮部尚
書致仕穆廟登極起戶部尚書尋乞終養再起刑部尚
書改左都御史事我皇上屢疏乞休伏蒙聖恩加秩給
驛特賜歲米人夫致仕萬曆六年正月內在家病故該
巡撫山東右副都御史趙賢巡按御史王藻各奏請卹

典該禮部題覆奉聖旨准照例與祭葬還與他諡欽此
又該吏部等衙門題請贈官等因奉聖旨卹守禮贈太
子太保尋賜諡端肅遣山東布政司右叅議嚴用和致
祭中書科中書舍人張世科造葬安厝訖惟時臣祖母
累封夫人王氏年已七十五歲感仰天恩屢囑臣等世
竭圖報乃不幸於二十一年十一月二十日病故查得
卹典條例開載凡二品以上文官妻曾受本等封者照
例與祭葬入稱二品文官曾經諭葬妻故在後授封夫

人者例合開墻合葬今臣祖母王氏累封夫人應有恩
卹似當據條例具請又查得原任都察院左都御史王
廷妻封夫人楊氏刑部尚書何鯨妻封夫人沈氏病故
各該本部覆奉欽依與祭開墻并祭其夫伏念臣祖母
生前已受封夫人三次而臣祖視二臣又特加有宮銜
恩數出自朝廷固非臣下子孫所敢希冀然風木徒茹
於一念愍卹實仰乎九重伏乞勅下禮部查議應得卹
典上請行令有司開臣祖父塋墻准令合葬祭壇內仍

列名并祭則臣祖父母均荷九天之渥澤潤及重泉而
臣舉家感戴聖朝待大臣之優禮當圖報於世世矣奉
聖旨禮部知道覆奉聖旨准照例與祭開壙合葬



集玉山房稿卷一

欽定四庫全書

集部
集玉山房稿卷二至四

詳校官中書_臣徐志晉

侍讀_臣孫球覆勘

總校官進士_臣楊懋珩

校對官中書_臣范鰲

謄錄監生_臣劉晉

欽定四庫全書

集玉山房稿卷二

明 葛昕 撰

恩卹贊語

少師大學士李公春芳

性資純粹問學淵深史館積有勤勞春曹雅稱寅直裂
麻承眷忠貞夙著於當時奉詔掄才藻鑑猶傳於今日
世廟重憑几之託莊皇嘉定策之勲翼翼小心培元氣

以臻和平之化謙謙雅度陶士習以成師濟之風跡未
老而辭榮真難進而易退庭闈養志孝友式重於鄉評
泉石凝神操履允孚乎士論宏材懿德完節全名藹然
先進之儀刑惜哉耆碩之湮殞所有恩恤宜從優厚

少傅太學士呂公本

夙侍講幄載典文衡入參大政荷聖主特達之知歸賦
閑居收里閭孝友之譽榮福咸萃壽考令終禮問已備
於生前卹典宜隆於歿後

少傅大學士余公有丁

天性冲醇問學深邃辟雍弘作人之化講幄攄弼亮之
謨公敏夙孚於佐銓寅清茂著於典禮肆羅俊乂矢竭
忠勤翊贊皇猷殫心盡瘁應得卹典宜示恩崇

少保兵部尚書王公崇古

許謨壯猷赤心偉度備倭海上屢收馘獲之功總制朔
方大著安攘之畧執亮叛而申我法紀布昭聖武於遐
荒孚遠人而堅其款誠永貽謚寧於列鎮生前既隆禮

問歿後宜備卹章

太子太保大學士嚴公訥

性資醇謹問學淵深夙稱東觀之名流無負中朝之偉望秩宗典禮績懋著於寅清銓部持衡明並符於冰鑑迨參密勿益殫忠貞及賁邱園尤持雅操合齒德爵為世所共尊積歲月時於人無異議高風令譽全節完名所有差官造墓於例實為允協

太子太保大學士陳公以勤

德性充醇忠猷宏邃立學純正而文章擅藻於詞林履
道端方而行誼夙孚於士論侍潛邸懋啓沃之功薦鼎
司著匡弼之績休休雅量表率百揆翼翼小心昭事聖
主方急流而勇退式高恬淡之風當處盛而鳴謙彌見
清修之節生無忝夫名臣歿有需於鉅典

太子太保工部尚書楊公兆

心本坦夷行崇博大由郎署而方面隨著賢聲自撫巡
而總戎尤懋偉績筦樞多安戢之畧董工宣節省之猷

况未老而辭榮殆急流而勇退所有造塋一應差官

都察院左都御史陳公价

操履端方蘊藉冲粹敷厯中外正直之譽望久隆佐總
部臺耿介之休聲茂樹精白無忝於屋漏忠貞每寓於
風裁用舍以時夷險不貳居家鄉評推重立朝士論攸
歸似應造塋以示優異

禮部尚書汪公鏜

問學閎博夙效編摩講讀之勞德性溫醇晚收長厚恬

退之譽行誼允孚乎閭里卹典宜備乎彞章

禮部尚書萬公士和

心性醇恪操履端貞秉直道以立朝允矣國人之望崇
素節以勵俗居然先進之風文章早擅於藝林行誼尤
隆於鄉黨所應祭墓自有典章

兵部尚書石公茂華

性本忠貞猷兼文武曹郎著冰蘖之聲岳牧表旬宣之
績一撫重鎮居然千里干城再秉節旄允矣三邊鎖鑰

卷二
樽俎收折衝之效金湯樹屏翰之勲賑恤心勞擘畫力
瘁所有差官造墓於例實為允宜

工部尚書郭公朝賓

性本忠貞才優康濟自郎署而為藩為臬聿著芳聲躋
卿貳而司農司空懋彰偉勩正直兼之忠厚博大運以
精明持耿介而終始不渝雅負端人之望敦朴素而內
外無間式昭先進之風清修夙協乎輿評操履尤嚴於
晚節所有營墓相應差官

工部尚書朱公衡

才猷卓犖器識弘深閩海作人多士沐菁莪之化青齊
開府一方貽安戢之庥治漕而轉輸永賴視部則經畫
尤宏愛洽羣黎所至尸祝而肖貌德孚輿論厯官冰蘖
以裊身相應差官以示優典

工部尚書倪公光薦

筮仕巖邑循良早播於民謠久任銀臺明慎允孚於士
論綽有先輩之風無忝大臣之節應得恤典宜按舊章

南京吏部尚書丘公櫛

賦性嚴凝提身孤介批鱗抗疏直聲已著於早年剔蠹
維風勁節弗衰於晚遇清廉無忝羔素古人之風度宛
然訓詁足式章縫後進之傳習斯在生為熙朝者舊歿
為海邦典型所有造墓相應遣官

南京吏部尚書王公本固

宅心清謹制行端嚴立朝而夷險一節雅負正人之望
居鄉而清白不擾綽有先達之風似應差官以示寵異

南京都察院右都御史海公瑞

剛介之操孤高之行謹言罔知遠害直道見諒於先朝
為民不忌侵官正氣尤凜於晚節應予恩恤宜備典章
南京禮部尚書何公維栢

樸貌古心清操直行立朝正色風采表於士林晚歲辭
榮德望高於閭里理學稱邃輿論攸歸相應造墓用示
優異

南京兵部尚書郭公宗臯

直諒之心忠貞之性犯顏敢諍風霜備歷於當年敵愾折衝勲烈尤隆於絕塞生前既蒙禮問歿後宜備恤章

南京兵部尚書蔭公武卿

存心坦夷制行端慤歷諸曹隨在底鎮靜之績撫藉兩京沒齒收清修之譽應予全葬仍復差官

南京兵部尚書郭公應聘

天性冲純行誼端恪建節嶺外懋收平定之功筦樞留京載表鎮靜之績物望彌久而彌隆出處以禮而以義

無愧大臣應予全卹

南京兵部尚書戴公才

天性端凝才猷恢豁秉節重鎮聿樹安攘之勛筦樞留
都式光鎖鑰之託立朝而正直有稱居鄉而孝友無間
相應差官併造墳壙

南京刑部尚書孫公植

真醇之性耿介之操由郎署而晉卿丞隨在馳清修之
譽歷憲臺而正部院所至樹直諒之聲跡賁丘園心辭

寵命式徵風度懋著休聞所有營葬似應差官

南京刑部尚書錢公邦彥

天性冲和行誼修潔敷歷中外正直之譽望彌隆退賁
丘園謹厚之休聲日茂應予造葬以示殊恩

南京工部尚書孫公應鰲

持身端謹制行清修夙稱東觀之耆英雅負西垣之偉
望撫治則仁洽黎庶陳謨而忠殫講帷世共推服人無
異議相應造葬特遣專官

吏部左侍郎兼翰林院學士周公子義

德性端凝問學淵邃清操無愧於屋漏簡質可擬之古人況夙效編摩之勞今特厯恩卹之旨仍應差官用示優異

集玉山房稿卷二

欽定四庫全書

集玉山房稿卷三

明 葛昕 撰

詩

西山北望

疊嶂回旋處蓬壺宛在茲潺湲遠浦度
蒼鬱秀雲馳虎豹千官衛龍蛇萬歲枝
憑虛顥對望佳氣帝王居

郊園偕西峪丈泛舟

曉日臨芳墅，簪聯秘苑卿。
層山迴艇秀，新柳拂衣輕。
鳥雜流泉韻，花傳擗鼓觥。
聖明大惠，醑身世總昇平。

遊天寧寺次鍾礪山韻

禪宇多幽意，招尋此共過。
花芬襲委佩，露藹帶松蘿。
樹老虬龍影，村深牧豎歌。
三竿未下榻，不羨夜鳴珂。

幻海苦塵擾，避喧此地過。
諸天儼法象，一水入烟蘿。
鷗傍磯頭釣，樵傳谷口歌。
松篁來絕巘，清韻勝瑤珂。

贈東昇上人

法王來西域梵剎插東天
複閣松杉迥浮圖星斗懸
濤聲酬鳥語雲影蔭川田
乙夜無生話塵心頓惘然

秋日湖上

公餘湖畔賞携仲步虛
房琴鼓清流碧杯浮嫩菊
黃浩源通太液遠嶂抱披
香曲罷饒佳况鳴榔夜渡
湘

送弘陽王丈之南光祿

無言建業遠自是帝王州
抱玉終還售懷珠安所求
金山紆紫氣皇路擁青旂
何處追芳度行看覲冕旒

偕張丈登嶧山次韻

周魯紆行逕相將重惠連春山餘客興晚樹麗賓筵鳥
語騰花氣鱗遊觸芰錢燭殘還劇思玉屑話便便
疊嶂盤旋處書門一逕分樹新浥過雨籟爽逐流雲簾
水從天落經聲隔洞聞主人意逾適命酌更成醺

贈易海州寅丈

海內懷知己屈指誰更深十年同案誼一掬為公心我
偶中州節君多魯國霖班荆恣笑語感慨舊槐音

屯司
有大

樹堂

路文園亭

有美名園地停驂一笑臨習池留霽日王榭枕芳尋世
事誰執掌吾徒自素心莫謂投簪逸蒼生望正深

送李縣尹

平原勞小試漢吏競鴻猷龍闕飛鳧去花城製錦遊政
清推建德俗羨羨雍邱晝日公庭靜鳴琴意自幽

遊靈巖寺

古寺何岑寂名山喜更過曲流山外澗翠倚石中蘿貝
葉浮禪榻曇花度鳥歌芳林多樂事身世欲南柯

將臺晚眺和蘇馥山

紫陌天衢開射闌銜杯覽勝夕陽歸千家雲樹葱蘢合
上苑霞光掩映飛塞北方傳息戰鼓朔南又報典征衣
草離花謝年年暮回首高臺挹落暉

贈友人任蜀

冀北此日空羣望海徼當年馭遠名聖主掄才偏保障

遐邦仰化待干城石崖雲度三春早
邛水鳬飛雙鳥明
天上鵷班離思切文翁萬里震賢聲

贈全太史使趙過省

名藩寵沐分符日天使承恩出禁闌
雙珮暫辭金馬去
片帆遙向玉河飛賦成梁苑花生筆
舞近南山綵作衣
我亦陳情歸未得羨君世美共春暉

壽王母太淑人

碧桃幾度海南開青鳥翩翩雲際來
人世喜逢周六甲

使君今已近三台
葱龍寶樹連芳合
燦爛天章取次裁
回首高堂同白髮
願言常對百年盃

明宇周丈留雲洞次韻

曾問留雲洞裏奇
由來天上使臣稀
龍垂鐘乳懸猶接
鵲啄岩花落更飛
似入武陵迷舊徑
欲乘槎木叩支機
蠻方思甫歸王化
引領樞光卜太微

七十峯頭一探奇
素心原與碧雲期
山僧解說談經口
樵父能傳治水碑
峭壁迎風蒼樹合
懸崖蔽日古藤垂

就中絕勝應難賦
搗管徒磨白雪詞

楊冢宰東歸

熙朝上宰抽簪日
一代題材曠古今
趙國完歸三獻璧
漢庭加錫二疏金
桃增萬樹仙源近
祿永千鍾帝澤深
感慨都門羣祖帳
高風千載賸玄心

抗疏金門久息機
承恩今始遂初衣
廟廊共惜山公隱
海岱欣迎謝傅歸
綠野堂開春正永
綏山興劇夢應稀
閒身自許烟霞外
赤舄還期曳紫微

邑涯邢公八袞

八十年來白髮繁守中漫自說真元鄉邦奕代簪纓族
齊魯名家齒德尊浥水碧波當海屋犁邱黃石種雲根
他年軒后行清蹕好上崆峒至道言

作伴求羊足隱淪素書丹竈百年自德培天漢三珠樹
慶衍仙班幾玉麟皤鬢鶴顏清岳岳峩冠豸紱樂申申
遙知舞綵添籌處一曲歌鳴萬洞春

李文奉使東藩

九重將命出嚴城符剖東藩擁傳行道載黃華香更遠
橐裝白雪夜還明霓旌飛度溜河色綠竹應聞魯殿聲
最是寅恭多世雅津亭何以慰離情

文所殿下賜韻和答

擁節遥臨帝子鄉皇華猶自愧星郎一從波浥天潢潤
頓覺風生玉殿香金谷春光空秀麗梁園詞賦邁尋常
賡歌白雪應難和一曲巴音對別觴

別崇崗宗侯

偶持使節過中州帝子相看意氣投德譽不殊河獻侶
詩才堪作杜陵儔草堂醉我青春讌郊舍憐君信宿留
攜手高臺極目處神京海甸總悠悠

韓中丞豐水園

稷下仙洲幾曲深千層荷氣籠幽岑高松密結藏雄閣
修竹陰森帶瑞禽百和香凝清客興數峯翠疊遠人心
乘槎不盡迴溪綠杳藹烟光海色臨

遊大慧寺

梵宮高插碧天西
綺檜層盤黻黼迷
有恨伊人緣底事
雕欄獨對雨淒淒

重過泰山

幾年今復過
名山石磴苔深鳥道寬
萬壑行雲千里樹
塵寰俯矚倚危欄

偶過小軒逢道士
飄然示我步虛聲
明月臨川風影靜
渾忘身在玉虛京

山園春秋

戲折桃花帶露餐白雲迷合俯迴湍輕風蕭瑟松陰下
舞玉霓裳入耳寒

瀛洲方丈與蓬壺誰道人間此景無三徑獨開心會處
山光水色足吾廬

暮春嶧山偕對宸張丈

聞道山靈異此日遂登臨主人饒逸興况復值春深
截窠千峯矗浸尋百竇吟禪堂棲古木檜響帶幽禽洞遠
岩花馥池明岼並森陳荀期不愧何事慕寧歆傾蓋餘

投分臭味幾知心我懷歸北闕君豈耽山岑努力康皇業
行看雪滿簪

易太守席約登東山

君自古良牧我亦葛天民羨君聲藉藉愧我車麟麟山
花逐客笑野鳥傍人馴一谷呈天異萬籟發吾真行李
依東道酣歌償麗晨執御吾何事朱幘漫爾屯

周敬所恩綸三錫編

河東有三鳳令望昭後先偉哉周氏郎曠世式踰躔伯

氏璠與高譜系更有仲季難兄弟一朝奮翮起天池次第剖符成錦製漢庭出璽褒明仁溫綸寵命何續紛父兮母兮兄及弟袍笏簪裾華如雲我幸同寅周仲子有懷高雅良無已藉誦龍章三錫編榮光自昔稱完美二陸已軼聞八荀或嗇位難封易老失古人何似世澤親顯被司馬家學自可尋聲華落落槐陰多君慈孝傳家史忍使忠盟負短簪

李文椿庭榮壽圖

老子昔去周函谷度青牛關尹攀紫氣道德衍千秋翻
然忽思遊人間李樹復指雍之邱雍邱優游七十載笑
把一籌添滄海鸞停鵠峙何矍鑠青鬢朱顏常不改有
子腰金侍紫宸汝作納言帝命新事業方輝伊陟譜奉
詔歸歡未老人獻罷綸綍舞萊服筵列松喬洛社賓南
山獻頌當此時青鳥正栖靈長椿椿年綿邈梅作友椿
庭蒼鬱槐當牖和羹若作須梅實食報咸知種槐叟肆
余櫟材何足論生平竊幸登龍門燕山聊寄靈椿頌頌

君世澤滿乾坤太史歲歲奏國瑞老人一星光晨昏

許丈使陝

都城祖帳旌旗擁送君將命如散隴腰褭嘶風千里間
壺觴落日情種種人生離合最關心況是相知知更深
候館陽關三唱徹漫將別思繼驪音憶昔承恩同鼓篋
君為成人我髻髮與君璧治遊春風更披春風鼓春色
成均卒業歸閭里地邈齊梁任爰止青霄萬里異圖南
奮翼扶搖爭迅舉可憐君先我着鞭參軍樞府望歸然

由來司馬誇神授重光奕葉相後先我今筮仕從君列
許謨猶伏君胥決皇皇使節又南征執掌紛紜誰與協
君家世業銘鼎彝磊落如君亦足奇榮承綸命歡親側
雍雍晝錦生春輝丈夫事業不可量世平主聖身餘壯
早來奏績上承明箕裘好副明時望君不見長孺正色
氣不羈德裕風猷特遇知二子豎立何炳炳肇基俶軼
吾與伊共期努力圖掀揭孰云沒李勛庸非可為

吳中丞席有感

春風藹藹春日暄肅將王命臨梁園梁園景物由來勝
開府至今康萬姓憶昔先公曾此署余方舞象隨朝暮
風塵荏苒幾經年秉節重遊感慨素主翁矯矯誇人龍
開閣滿座意豪雄三生不負盱山斗五夜尊前肝膈剖
狂呼長嘯發酣餘傾蓋勞君故非偶我歌酒倒樽我醉
月傾輪曾聞嵩嶽關賢佐願祝君家作甫申

集玉山房稿卷三